



Pharaon est derechef endurcy par les tenebres, qui sont enuoyées au pays d'Egypte.

OMBIEN que les signes precedens deuoient émouuoir Pharaon à obeïr aux commandemens de Dieu, toutesfois il fut endurcy, n'ayant égard aux merueilles de l'Eternel. Mais Moÿse avec Aaron a encores recours à Dieu, qui luy dit, Estens ta main vers le Ciel. Il estendit sa main vers le Ciel, & lors tenebres furent faites sur toute la terre d'Egypte par trois iours, si que l'vn ne voyoit point l'autre; nul aussi ne se leua de son lieu par trois iours: mais à tous ceux d'Israël fut lumiere en toute leur habitation. Adonc Pharaon appella Moÿse & Aaron, & leur dit, Allez sacrifier au Seigneur, tant seulement vos brebis & vos bœufs demeureront; vos petits enfans iront aussi avec vous, Et Moÿse répondit, Tu nous bailleras aussi les sacrifices & holocaustes que nous offrirons au Seigneur nostre Dieu: Et nos troupeaux iront avec nous, sans qu'il en demeure vn ongle: car nous prendrons d'iceux pour seruir au Seigneur nostre Dieu. Aussi ne sçauons-nous de quoy nous devons offrir, tant que nous soyons paruenus sur le lieu. Mais le Seigneur endurecit le cœur de Pharaon, & ne les voulut laisser aller. Et dit à Moÿse, Va t'en arriere de moy, & garde-toy de plus comparoistre en ma presence; car tu mourras le iour que tu auras veu ma face. Lors Moÿse répondit, Soit fait ainsi que tu l'as dit, Je ne verray plus ta face.

Exode Chap. 10.